

Reglament interior de la formacion continua

Encastre :

Las accions de formacion continua dels regents pagats per l'Estat s'aestisson dins l'encastre juridic de la convencion passada entre lo C.F.P.O. e lo ministèri de l'Educacion Nacionala lo 20 de mars de 1997 d'una part, e de las disposicions del libre IX del còde del trabalh.

Dins l'encastre de sa mission de formacion continua, lo C.F.P.O. trabalha en partenariat sarrat amb

- * la Confederacion Occitana de las Calandretas,
- * las federacions regionalas de las Calandretas,
- * l'establiment d'ensenhament superior occitan **APRENE** e sos paissèls ajudaires,
- * los delegats confederal e federal de regents.

Lo C.F.P.O. desira de decentralizar la formacion continua al mai pròche de las escòlas, e volonta de daissar espelir l'iniciativa e la presa de responsabilitat dels regents. Per aquò far, institucionaliza lo títol de referent d'accion de formacion continua. D'unas d'accions confederalas, las que tòcan los cinc sectors cèrca de l'Establiment APRENE, auràn un referent logistic e un responsable pedagogic causit demèst los Paissèls-Ajudaires.

Per far de referent d'una accion, cal aver l'estatut de professor d'escòla titular d'una classa, cal obténer l'acòrdi del C.F.P.O. e prene a sa carga lo consirar de l'organizacion materiala, administrativa e financièra d'una accion. Se l'accion es acceptada pel C.F.P.O., presentada e acceptada pel ministèri d'Educacion Nacionala, e que lo referent s'engatja de la menar a bona fin, seguit comprés, aquela accion d'aquí se farà.

Lo C.F.P.O. remembra que l'autoritat de tutela que finança, lo ministèri d'Educacion Nacionala, sèrva un drech de contraròtle pedagogic, didactic e financièr, aquò tant de temps coma la lei o prevei.

Qualques règlas de respectar :

1 - Cal mandar ABANS LO 18 D'ABRIL al C.F.P.O. las proposicions detalhadas de las accions de formacion continua previstas per l'annada escolara que debuta al mes de setembre.

2 - Cada accion prevei : lo nom del regent-referent de l'accion (obligatòri), la(s) data(s), lo(s) luòc(s) detalhat(s), lo volum orari, lo tèma, lo public convidat e l'objectiu de l'accion cap al public aquel, lo nom e las qualitats dels interveïnes, l'organizacion globala de la jornada (dinnar comprés), e un pichòt budget per marcar lo còst de cada element e lo còst total de l'accion.

3 - 50% del temps de la formacion continua, al mens, se debana en defòra del temps escolar.

4 - En acòrdi amb la Confederacion Occitana de las Escòlas Calandretas, lo C.F.P.O. acceptarà pas d'accion de formacion continua que faga pèrdre una jornada escalora als calandrons pr'amor de la tancadura d'una escòla.

5 - Lo C.F.P.O. porgís pas al remplaçament dels regents que daissan la classa per anar en formacion continua.

6 - Per cada abséncia d'un regent dins sa classa pr'amor de la formacion continua, cal que lo cap d'establiment de la Calandreta avise l'Inspector de circonscripcion, per letra. La letra aquela a d'arribar a l'I.E.N. mai o mens 4 setmanas abans la començança de la formacion. Aquela letra servirà de pròva en cas d'accident de trajècte.

7 - Lo regent-referent de l'accion farà parvenir al C.F.P.O. la(s) grasilha(s) d'emplec del temps de l'accion de formacion, tant d'ora coma possible, e al mai tard la setmana abans la començança efectiva de la formacion.

8 - Lo regent-referent de cada accion de formacion continua realizada, mandarà al C.F.P.O., dins la mes que seguís l'acabada de l'accion, una sintesi del contengut e del debanament, los fuèlhs de preséncia signats, las facturas e los fuèlhs de reemborsament.

9 - A partir dels fuèlhs de preséncia signats, lo CFPO porgirà als regents una atestacion de participacion. Lo contengut serà validat pel regent-referent.

10 - Lo C.F.P.O. pren a sa carga lo còst de l'albergament e de la restauracion dels estagiaris en formacion continua fins als limits següents : 10€ per persona e per repais, 20€ per nuèchada e per persona. Los estagiaris pagaràn lo subrecòst, se ne vira.

11 - La restauracion dels intervenents, tre qu'es justificada pel planejament de la jornada, serà a la carga del C.F.P.O.

12 - Lo C.F.P.O. pren pas a sa carga lo desplaçament dels estagiaris de la formacion continua.

13 - Lo C.F.P.O. pren a sa carga lo gast pedagogic de las accions acceptadas pel ministèri d'Educacion Nacionala, per tant qu'aqueles gastes sián legalament elegibles. La tarifa estandarda de l'ora d'un intervenent de la formacion continua es de 23€ l'ora passada amb lo grop. En cas de demanda d'un pretz superior cal un vejaire associatiu (çò que demanda de temps).

14 - Los desplaçaments dels intervenents e dels referents son reemborsats sus la basa :

- dels fraisses quilometricas a 0,23€/km,
- d'un tilhet de tren en segonda classa de son domicili a la sala ont se passa la formacion.

15 - Lo regent-referent de l'accion demandarà a l'intervenent de fargar una factura. Aquela factura deurà indicar lo n° de SIRET, lo pretz de l'intervencion (còst orari multiplicat pel nombre d'oras) e, se ne vira, lo còst del desplaçament.